

# 1,000 jayakan kempen tanam pokok bakau

17 Oktober 2016 12:27 AM



SEBAHAGIAN daripada peserta yang terlibat dalam program penanaman 10,000 pokok bakau di Kampung Sungai Tiram, Lumut, Perak, kelmarin. UTUSAN/NURUL AKMAR AIDA SUHAIMI

**LUMUT 16 Okt. – Kerajaan negeri memperuntukkan RM200,000 untuk membina sebuah pusat penerangan mengenai hutan paya bakau yang dikenali sebagai Pusat Interpretatif di Kampung Sungai Tiram di sini.**

Pengerusi Jawatankuasa Pelancongan, Kesenian, Kebudayaan, Komunikasi dan Multimedia negeri, Datuk Nolee Ashilin Mohamed Radzi berkata, pusat tersebut akan dijadikan produk eko pelancongan di negeri ini dan akan mula dibina tahun hadapan.

Menurutnya, pusat berkenaan akan memberikan kesedaran kepada masyarakat mengenai pentingnya tanaman bakau kepada ekosistem di negeri ini.

“Pembinaan pusat penerangan hutan paya bakau ini juga bertujuan menarik kedatangan pelancong ke kawasan ini yang mampu menjadi sumber ekonomi penduduk,” katanya.

Beliau berkata demikian selepas Majlis Perasmian Jambatan Ilmu dan Penanaman 10,000 anak pokok bakau di Kampung Sungai Tiram di sini semalam.

Turut hadir Panglima Bantuan Tentera Laut Diraja Malaysia (TLDM), Laksamana Madya Datuk Abd. Ghani Othman dan Ahli Dewan Undangan Negeri (ADUN) Pasir Panjang, Datuk Rashidi Ibrahim.

Pada majlis tersebut, sebanyak 10,000 anak pokok bakau ditanam di kawasan Terosot Teluk Tiga, Kampung Sungai Tiram.

Menurut Nolee Ashilin, program itu mendapat kerjasama daripada pihak Pentadbiran Tanah dan Daerah Manjung, TLDM dan Pertubuhan Sahabat Hutan Bakau Lekir Sitiawan (SHBLS).

“Kira-kira 1,000 peserta dari jabatan kerajaan di Daerah Manjung, Institusi Pengajian Tinggi, sekolah serta masyarakat tempatan terlibat dalam program penanaman pokok bakau ini,” katanya.

Sementara itu, Pegawai Daerah Manjung, Mohd. Fariz Mohamad Hanip berkata, pihak Majlis Perbandaran Manjung (MPM) juga akan memulakan fasa Green untuk pekan Lumut bagi menyahut seruan aspirasi yang dijalankan oleh TLDM dalam pemuliharaan hutan paya laut.

Menurutnya, penanaman anak pokok bakau akan diperluas ke Kampung Sitiawan dan pihaknya sudah mengenalpasti kawasan yang akan diwartakan sebagai kawasan paya bakau.

“Kita juga akan melakukan penanaman pokok bakau di Pulau Pangkor bagi menghijaukan kawasan itu,” katanya.